

Headline	PUSAT PEMBELAJARAN URUS EKOSISTEM GAMBUT		
MediaTitle	Harian Metro		
Date	18 Jul 2018	Color	Full Color
Section	Nuansa	Circulation	112,705
Page No	36	Readership	338,115
Language	Malay	ArticleSize	337 cm ²
Journalist	N/A	AdValue	RM 13,276
Frequency	Daily	PR Value	RM 39,827



PUSAT PEMBELAJARAN URUS EKOSISTEM GAMBUT

Masyarakat diberikan pendedahan untuk memahami sistem hutan paya gambut yang rumit dan kepentingan melindungi tanah gambut bagi mengurangkan kesan perubahan iklim serta melindungi biodiversiti negara tidak ternilai itu.

Usaha itu menerusi penubuhan 'Community Sustainable Peatland Centre' (CoSPEC) di Kampung Raja Musa, Kuala Selangor berhampiran Hutan Simpan Raja Musa.

CoSPEC adalah pusat pembelajaran dan perkongsian bersepadu untuk komuniti tempatan untuk mempelajari berkenaan pengurusan mampan ekosistem gambut yang dirasmikan Pengarah Jabatan Perhutanan Negeri Selangor (JPNS) Datuk Dr Mohd Puat Dahalan, baru-baru ini.

Dr Mohd Puat berkata, penubuhan pusat itu untuk menyokong usaha Kerajaan Selangor dalam usaha mengatasi perubahan iklim dan meningkatkan kelestarian biodiversiti, berkongsi pengalaman dan



amalan terbaik dalam usaha memulih serta memelihara hutan paya gambut.

"Ini termasuk pengurusan hutan melalui program kesedaran seperti pembabitn komuniti tempatan untuk mencegah kebakaran hutan dan pengurusan hidrologi berdekatan hutan simpan, pemuliharaan hidupan liar serta penanaman pokok.

"Penubuhan pusat ini tidak mungkin berjaya tanpa sokongan HSBC Bank Malaysia Berhad dan Pusat Alam Sekitar Global (GEC) yang komited dalam menyokong Kerajaan

Selangor, JPNS bagi program Pemulihan Hutan Raja Musa dan Pelan Pengurusan Bersepadu untuk Hutan Paya Gambut Utara Selangor 2014 hingga 2023," katanya kepada Nuansa.

Sementara itu, Pengarah GEC Faizal Parish berkata, penubuhan pusat terbabit sebagai tanda sokongan kepada perkembangan dasar dan amalan baik untuk pemuliharaan dan perlindungan gambut sepanjang tempoh akan datang.

Katanya, di bawah pentadbiran GEC, GEC-CoSPeC akan

menumpukan perhatian dalam mengenal pasti isu dan keutamaan untuk memulihara, melindungi dan memulihkan Hutan Paya Gambut Selangor Utara (HPGSU).

"Kami juga menggalak dan meningkatkan kesedaran dan memahami kepentingan pengurusan ekosistem gambut yang mampan dan menyokong mata pencarian komuniti luar bandar serta mencegah kebakaran.

"Matlamat pusat ini termasuk memperkasakan Sahabat Hutan Paya Gambut Selangor Utara

sebagai mekanisme yang mempunyai impak tinggi dalam penyertaan komuniti untuk memulihara sumber semula jadi di HPGSU dan mempromosikan ekopelancongan sebagai sumber alternatif kehidupan," katanya.

Sejak bermulanya program Pemulihan Hutan Raja Musa pada 2008, sebanyak 116,000 pokok ditanam dalam kawasan seluas 194 hektar membabitkan 22,000 sukarelawan di Hutan Simpan Raja Musa dengan kerjasama GEC dan JPNS.